

52653/P

D. CHRIST. ADOLPHUS WENDLER

MED. POL. FOR. PROF. PUBL. ORD.

ET

UNIVERSITATIS LITERARUM LIPSIENSIS

H. T.

P R O C A N C E L L A R I U S

P A N E G Y R I N M E D I C A M

IN

AUDITORIO IURIDICO

DIE XI. M. MARTII A. MDCCCLV

CELEBRANDAM

INDICIT.

Quaest. Med. For. Part. II.

De ambigua corporis delicti notione.

D. CHRIST. ADOLPHUS WENDLER

1811

1811

1811

1811

D. CHRIST. ADOLPHUS WENDLER

1811

Digitized by the Internet Archive
in 2018 with funding from
Wellcome Library

1811

1811

1811

1811

<https://archive.org/details/b30364140>

Et si quod ante aliquot menses prolusionis academicae causa tractaveram gravissimum illud argumentum de medicinae forensis studii necessitate eo minus absolutum atque exhaustum esse iudicaverim, quo magis hanc ipsam materiam et amplitudine et difficultate pollere inter omnes constat, tamen quae de ea dicenda restant alia opportunitate academica oblata propediem expositurus hodie ad specialiora pariter accuratiore explicatione digna transire apud me constitui. Facile etenim observandum est, in ipsa medicina forensi, cuius summum officium in eo positum esse omnes bene sciunt, quod causas dubias artis salutaris auxilio Ictis solvat atque illustret, varia adhuc inveniri argumenta dubia et clariore sane luce admodum carentia. Quae quidem si de materiis solummodo valerent ex gravi illo et amplo scientiae naturalis campo petitis, cuius singulari studio ars nostra utique augenda est atque amplificanda, vix mira nobis videri potuerint, cum multas huius ipsius doctrinae partes vastis etiamnum nebulis obteatas esse indefessa perscrutatorum assiduitate paulatim dissipandis, neminem nostrorum fugiet. Sed prae ceteris dolendum est, medicinam omnino publicam notionibus repletam esse incertis ac vacillantibus, quibus alii alium sensum subiicere consueverunt, quarumque significationibus mox dilatatis mox restrictis exoptatissima illa doctrinae perspicuitas tandem afferri poterit.

Ut alia taceam, luculentissimum huius rei exemplum in gravi illa corporis delicti notione afferam, quae, quanta sit, a multis non satis intelligi videtur. Singulos enim et iuris criminalis et medicinae foren-

sis scriptores de eius finibus inter se discrepantes legimus, quo factum est, ut quae in omni diiudicatione criminali ad causas aperte dubias prae ceteris pertinere videatur corporis delicti explicatio atque constitutio, ipsa notionis ambiguitate magis dubia ac incerta, totiusque rei enucleatio inde complicatior evaderet.

Vocabuli corporis delicti originem investigare conati hanc vocem, teste FEUERBACHIO¹⁾ ab ICTis medii aevi formatam esse docemur, qui, ubi in inquirendo homicidio cadaver interfecti inventum erat, de corpore delicti prima vice sermonem fecerant. Cum vero iamiam ex iuris germanici principiis cadaveris detectio ad constituendum crimen homicidii maximam omnino vim haberet, deficiente corpore defuncti corpus delicti utcunque deesse pronunciabant. Sensim haec ipsa denominatio etiam ad alia crimina translata est, qua nimirum obiecta certa reperta esse significare voluerunt ad delictum quoddam legibus poenalibus rite subiiciendum necessaria, ita, ut de corpore delicti, e. c. furti, adulterii etc. eruendo probandoque frequentissime dictum esset. Tandem vero apparebat, hanc ipsam rem maximi momenti esse et in iure criminali in universum, ubi delicta poenis ordinariis obnoxia constituuntur, et in processu criminali in specie, ubi inquisitionis quaeritur fundamentum certum et ab omni temeritatis suspicione plane liberum. Igitur scriptores varii de distinctae corporis delicti definitionis necessitate persuasi singulas notionis partes componere diverso modo studuerunt, ita tamen, ut germanici vocabuli *Thatbestand* significatione corporis delicti sensum bene exprimi posse omnes fere consentirent, excepto MARTINO²⁾, qui terminum technicum latinum ex etymologia arctiorem esse contendit, quam vernaculum illud: *Thatbestand*, cui

1) *Lehrbuch des peincl. Rechts, herausgegeben v. MITTERMAIER, Giessen 1840. §. 81 und folgende.*

2) *Lehrbuch. §. 28, Note 7.*

autem eo minus assentiendum esse arbitror, quo magis generatim sub
 notione corporis complexum rei cuiusdam diversis partibus compositae
 intelligere solemus. Quare cum iam veteres C. C. C. Art. 6 interpre-
 taturi in exhibenda corporis delicti definitione solummodo signa obie-
 ctiva respicerent, MEISTER³⁾ eodem fere sensu sententiam suam profere-
 bat his verbis: „corpus delicti denotat existentiam seu veritatem delicti
 alicuius commissi, et quidem speciatiim delicti obiective spectati, i. e.
 ipsius laesionis in se spectatae citra respectum ad determinatam perso-
 nam auctoris eius.“ Veritatem autem ad hanc definitionem proprie non
 pertinere, subiectiva contra indicia in constituendo corpore delicti nun-
 quam omittenda esse cum *aliis*⁴⁾ contendo. Nam assumere licet omni
 delicto sive culpam sive dolum subesse, nec praeterea de perpetrato
 aliquo crimine unquam sermo esse poterit, nisi respicere velimus, an
 id ipsum auctoris personae profecto possit imputari, ita, ut e. g. mania-
 cum crimen homicidii commisisse nunquam dici potuerit, etiamsi ho-
 minem ab eo interfectum esse satis superque constet. Tandem neglectus
 ille ad determinatam personam auctoris respectus, cui etiam BIENER⁵⁾
 accedit, definitionem ipsam angustiozem reddere, et speciali criminis
 notioni revera contradicere videtur. Etenim indicia subiectiva et qua-
 litates certas personales ad naturam et complexum delictorum specia-
 liorum ita pertinere, ut illis deficientibus crimina talia existere et cogi-
 tari nullo modo queant, nemo sine dubio infitias ibit. Nullum v. c.
 crimen parricidii sine probata illa auctoris cum interfecto cognatione.
 Alia est contra sententia, quam STUEBEL⁶⁾ in libro suo de hac re
 peculiari promulgavit, corpus delicti summam omnium eorum factorum
 appellandum esse ratus, quae ex legibus poena criminali mulctanda

3) Principia iur. crim. cap. II. §. 94.

4) TITTMANN, WAECHTER et pl.

5) Delibata quaedam de corpore delicti capita. Lips. 1801.

6) Ueber den Thatbestand der Verbrechen. Wittenberg 1805.

sunt, ne minimo vero imputationis respectu habito. De hac ipsa restrictiore sane interpretatione quid iudicandum sit, iam supra monui, eamque a **KLEIN** et **KLEINSCHROD**⁷⁾ non acceptam esse laetor. Plura vero ac multo magis ad rem nostram constituendam et illustrandam idonea inter noviores contulisse mihi videntur **ABEGG**⁸⁾ et **MAREZOLL**⁹⁾, qui corporis delicti notionem in complexu omnium legalium criminis cuiusdam indiciorum quaerentes diversitatem eius vel in genere, vel in specie, vel essentialem vel non essentialem, et pro rei ratione vel obiectivam vel subiectivam agnoverunt, ideoque huic notioni maiorem quo eget ambitum vindicaverunt. Tali etenim sensu plura ex aliorum voluntate ab hac definitione plane removenda, uti criminis locus, instrumenta, violentiae vestigia huc et illuc conspicua etc. corpori delicti merito adnumerantur.

Ut autem nunc ad inclytum medicinae forensis scriptorem transire liceat, mirandum est sane, **E. PLATNERUM**, virum olim ingeniosissimum, de cuius in hac doctrina auctoritate nemo fere dubitabat, hocce argumentum angustissimis finibus circumscripsisse, quod iam ex Quaestionis 22 titulo¹⁰⁾ luculenter apparet, qui arctam omnino corporis delicti notionem proponit. Secundum **PLATNERI** enim sententiam ultra corpus delicti pronuntiare nihil aliud significat, quam ultra id „quod in cadavera deprehensum fuerit“ aut „ultra res a dissecatore visas et repertas.“ Si porro alio in loco huius ipsius Quaestionis dicit: „collegia medicorum debent profecto non ea tantummodo illatae necis vestigia persequi, quae in ipso corpore delicti apparent, sed, ubi hoc ad pronuntiandum non satis materiae habet, caetera quoque indagare et proferre, quae vel in rei, vel in testium verbis, tum in locorum atque temporum ratio-

7) *Archiv des Crim. Rechts*, B. 3. St. 1. pag. 38 u. flgd.

8) *Lehrbuch d. Strafrechts-Wissenschaft*. Neustadt a. d. O. 1836.

9) *Das gemeine deutsche Crimin.-Recht*. Leipz. 1841.

10) *An collegiis medicorum non liceat ultra corpus delicti pronuntiare?* 1803.

nibus posita deprehenduntur,“ ac serius : „, Cur duplex nonnunquam quaestio nobis proponitur, altera ex corpore delicti, altera ex caeteris argumentis diiudicanda?“ si in hac ipsa prolusione ubique cogitata nobis obvia veniunt aequalem explicandi rationem offerentia, vocabulum corpus delicti et vetustate absumto et restrictiori sensu a se usurpatum esse auctor ipse confitetur, nempe pro iis solum indiciis, quae ex legali cadaveris obductione cognoscuntur, ita, ut partim haec notio nonnisi in crimine homicidii adhibenda sit, partim aliquod tantum totius inquisitionis criminalis momentum explere videatur. Istam autem aequae imperfectam ac obsoletam significationem tempore Platneri multis placuisse profecto miror, nec Iuristarum nec medicorum interim aliquem superstitem esse spero, qui tam mancam explicationem etiamnum nobis satisfacere posse credat. Superflua itaque ac fere inanis evadat necesse est omnis auctoris illius de hac quaestione disputatio: an collegiis medicorum non liceat ultra corpus delicti pronuntiare? quae PLATNERO omnimodo ideo erat affirmanda, quod eo medicorum collegiis latior aperiretur diiudicationis campus, quam ista corporis delicti notio hucusque iis concesserat, nobis autem strenue neganda est, ne medicorum collegia, dum ultra corpus delicti pronuntiare ausa essent, officiorum fines per libera arbitria transiisse videantur. Scilicet nullis, qui vel propria et forensi significatione revera iudices sunt, vel saltem quodam iudicum munere funguntur, ultra ea diiudicare unquam licebit, quae per inquisitionem criminalem, i. e. obiecti explorationem, rei confessionem, testium examina, temporis, loci et instrumentorum respectum e. s. pl. tanquam certa criminis commissi indicia cognita erant atque probata. Quod si iudices his singulis momenti bene componendis, subtiliter illustrandis, et acute inter se comparandis constanter incubuerint, in eruendo corpore delicti nihil ab iis neglectum esse iure praedicari poterit.

Scripta haec sunt, ut iis more academico producerentur atque commendarentur septem candidati, quorum primus d. XIII. April., secundus d. II. Iul., tertius d. XVII. Sept., quartus d. XX. Sept., quintus d. XXVI. Septbr., sextus d. XX. Dec. anni praeteriti summos in arte medica honores obtinuit, septimus vero iisdem ornabitur proxime. Quae de vita hucusque acta praesertim academica mecum illi communicaverunt haec sunt:

I.

CAROLUS EMILIUS GEHE.

Natus sum Dresdae d. m. Iun. VIII. a. h. s. XVIII, patre CAROLO HERMANNO, mercatore, et matre WILHELMINA, e gente WEINHOLDIANA, quorum vitam carissimam Deus O. M. usque ad extremos vitae limites servare velit.

Primis religionis christianae literarumque elementis privatim acceptis, anno XV gymnasium St. Crucis adii, ibique per sexennium institutione praeceptorum doctissimorum egregia usus sum. Sic a. h. s. XXXIX m. Mai. ab Exc. WEBERO, t. t. Rectore Magn., in Album universitatis, ad medicae artis studium relatus, audivi Exc. SCHWAEGRICHENUM de zoologia et botanice, Exc. FECHNERUM de physice, Exc. WEBERUM de anatomia et physiologia, b. HEINROTHUM de anthropologia, Exc. KUEHNIUM de chemia, Exc. BRAUNNIUM de materia medica, Exc. CERUTTIUM de pathologia et therapia, Exc. GUENTHERUM de chirurgia, Exp. CARUM in arte fascias alligandi, Exp. RITTERICHIIUM de oculorum morbis, Exc. WENDLERUM de medicina forensi, Ill. IOERGIUM de arte obstetricia. Ad practicam institutionem transgressus, frequentavi scholam clinicam regiam sub auspiciis Ill. CLARI et Exc. GUENTHERI, institutum obstetricium duce Ill. IOERGIO et institutum policlinicum praesidibus Exc. CERUTTIO et Exc. BRAUNIO. Quibus omnibus viris optime de me meritis gratias persolvo quam maximas.

Examen pro Baccalaureatu d. XXIV. m. Iulii h. s. XLI, obstetricium d. m. Sept. h. s. XLIII, et rigorosum d. VI. m. Martii anni currentis superavi.

Cum in priori tertiam, in altero autem secundam censuram accepisset, defensa dissertatione: „De morbillis“ Medicinae e Chirurgiae Doctor creatus est.

II.

EDUARDUS WENGLER.

Natus sum die vicesimo tertio mensis Septembris anno huius saeculi undevicesimo, patre IOANNE DAVIDE, verbi divini tunc temporis apud Grosserkmannsdorfenses magistro, et matre CAROLA SABINA DOROTHEA e gente AB AMMON, quibus parentibus dilectissimis liberorum saluti incredibili amore intentis, pro innumeris erga me beneficiis gratias ago enixissimas, quosque ut Deus O. M. diutissime incolumes servare, iisque placidam senectutem aerumnisque vacuam parare velit, ferventissimis precibus oro et obsecro.

Prima qua aetas puerilis imbuti solet disciplina paterna instructus, anno aetatis decimo tertio et dimidio gymnasio Dresdensi ad aedem St. Crucis adscriptus, ibi per quinque annos et dimidium institutione praeceptorum dignissimorum usus sum.

Anno h. s. tricesimo octavo mense Septembris academiam adii medicino-chirurgicam Dresdensem, ibique in primordiis de arte salutari institui coepi. Viri celeberrimi, quales B. SEILERUS, REICHENBACHIUS, PECHIUS, RICHTERUS aliique, quantum de me meruerint, in dies magis agnosco, maximas vero debeo gratias GUENTHERO, prosectori t. t. eruditissimo. Interiecto anni et dimidii spatio paschali tempore a. h. s. quadragesimo Lipsiam me contuli, et inter cives receptus sum academicos Rectore Magnifico t. t. Ill. CLARO. Disserentes audivi: de botanice Exc. SCHWAEGRICHENIUM et Exp. KUNZIUM, de mineralogia Exc. SCHWAEGRICHENIUM, de zoologia Exp. POEPPIGIUM, de physice Ampl. BRANDESIUM et Exp. LEHMANNUM. Chemiam et theoreticam et practicam debeo Exc. KUEHNIO et Exc. LEHMANNO, anatomiam et physiologiam et embryologiam me docuerunt et R. M. WEBERUS et Exp. WEBERUS, anatomiam comparatam Exp. ASSMANNUS, anthropologiam Beat. HEINROTHUS. In materia medica praeceptorem habui Exc. BRAUNIUM, in pathologia generali Exp. HASPERUM, in speciali Exc. CERUTTIUM, in chirurgia Exc. GUENTHERUM, in arte obstetricia Ill. IOERGIUM et Exp. GRENSERUM. Praeterea Exc. WENDLERUM de medicina forensi, Beat. HEINROTHUM de psychiatria, Exp. HASSIUM de anatomia pathologica disserentes audivi.

Ita ad studia practica praeparatus, institutum clinicum St. Iacobi ducibus Ill. CLARO, Exc. WENDLERO et GUENTHERO adii, instituta vero polyclinica Exc. CERUTTIO et BRAUNIO, chirurgicum denique Exc. WALTHERO et Exp. CARO ducibus, nec non scholam obstetriciam regiam, quae sub Ill. IOERGII auspiciis floret, frequentavi.

Inter hos viros sunt quatuor, qui maximis erga me benevolentiae exhibitae speciminibus valere: Exc. CERUTTIUS et BRAUNIUS et GUENTHERUS et Exp. GRENSERUS, quibus viris quantum debeam, nunquam obliviscar.

Examen pro Baccalaureatu die vicesimo sexto m. Ianuarii a. h. s. quadragesimo secundo, obstetricium die undevicesimo m. Decembris a. praeterlapsi, et rigorosum quod vocatur die quinto m. Iunii a. currentis superavi.

Retulit ex priori examine tertiam, ex practico vero secundam censuram, et cum dissertatio sub titulo: „*Lithotomiam interiectis pluribus posse perfici intervallis probatur exemplis*“ rite ab eo esset defensa pariter Doctor creatus est.

III.

LUDOVICUS AUGUSTUS BLANKMEISTER.

Natus sum Langenbaci in Variscia Saxonum D. M. Augusti XVIII, anno hui. saec. XX. patre LUDOVICO GUILLIELMO, eiusdem loci verbi divini ministro, matre SOPHIA, e gente CHRISTIANA, quos parentes carissimos Deus O. M. ut diu incolumes conservet, ex intimo animo precor. Iam VII. aetatis anno ex avorum voluntate Martisburgam deductus, et institutione NEUBERTI, deinde beati MITZSCHKII ad gymnasii studia praeparatus, hoc ipsum adii anno h. s. XXXI. Sed avia carissima defuncta in patria arva reversus, et anno XXXVII. in numerum alumnorum Ruthenei Schleizensis receptus, ibi atrum illum vidi diem, qui in cineres urbem deplorandam commutavit. Ita tamen quasi orbatum tertium Plaviense excepit gymnasium, cuius praeceptores quantopere de me meriti sint, gratissimo semper animo recordabor. Minime vero horum virorum egregiam liberalitatem et benevolentiam, qui amicissimo ibi hospitio me exceperunt, ac filii iuribus ornarunt, apto, quo decet, sermone describere valeo.

Anno XL. inter cives huius Literarum academiae, medicinae operam daturus, a Rectore t. temp. magnifico, Ill. CLARO relatus sum, ibique audiivi magistros de Zoologia, Botanice, Mineralogia Rev. SCHWAEGRICHENIUM, KUNZIUM et POEPPIGIUM, de Physice Beat. BRANDESIUM, de Anatomia et Physiologia Celeb. WEBEROS fratres, de Encyclopaedia et Methodologia Dilect. KNESCHKIUM, de Chemia et theoretica et practica Exc. KUEHNIUM, de Anthropologia Beat. HEINROTHIUM, de Philosophicis Exc. DROBISCHIUM et HARTENSTEINIUM, de Anatomia comparata Exc. ASSMANNUM, de Aeschylo Ven. HERMANNUM, de Historia Romana Exc. WACHSMUTHIUM. Artem obstetriciam mihi tradidit Ill. IOERG, Materiam medicam Exc. BRAUNE, Pathologiam generalem Exc. RADIUS, Therapiam generalem Exc. NEUBERT, Pathologiam et Therapiam specialem Exp. CERUTTI, Chirurgiam Exc. GUENTHER et CARUS, Mulierum morbos Exc. GRENSER, Anatomiam pathologicam

Exc. HASSE, Medicinam forenses Exp. WENDLER, ophthalmologiam Exp. RITTERICH, Pathologiam Exc. LEHMANN. Institutum regium clinicum rite frequentavi ducibus Ill. CLARO, WENDLERO et GUENTHERO, policlinicum moderatoribus Exp. CERUTTIO et BRAUNIO; scholam obstetriciam magistro Ill. IOERGIO, institutum ophthalmiatricum directore Exp. RITTERICHIO adii. Horum omnium magistrorum innumera de me merita non desinam maximifacere, eorumque memoriam grato semper et pio animo recolere.

Examen theoreticum D. m. April. IX., anni h. s. XLII., obstetricium D. m. Ian. XV. anni XLIV., practicum D. m. Augusti X. eiusdem anni absolvi.

In quibus examinibus candidatum prima censura ornatum esse laetamur. Denique post defensam dissertationem sub titulo: „*De Paracentheseos thoracis effectu experientia monstrato*“ Doctoratus honores obtinuit.

IV.

GOTTLOB BERNARDUS DRESCHKE.

Natus sum Rabenaviae, die II. mens. Maii, anno h. s. vicesimo, patre CHRISTIANO GOTTLOB, saltuariorum regis principe, quem praematura morte mihi ereptum ad ultimum vitae habitum lugebo, et matre CHRISTIANA SOPHIA, e gente GERLACHIANA, quam superstitem, ut Deus O. M. per multos adhuc annos incolumem mihi servare velit, enixissimis precibus oro. Prima eruditionis elementa debeo viro maxime venerabili FIEDLER, sororis marito, pastori Niederbobritzschensium, cui optime de me merito nunc, data occasione, publice gratias ago quam maximas.

Postea quum altioribus studiis operam dare constituissem, adii scholam crucianam Dresdae florentem. Examine ibi maturitatis mens. Sept. anni s. MDCCCXXXIX. feliciter superato, quum iam diu tempus viresque medicinae studio navare mihi propositum esset, civium Academiae Chirurgico-medicae numero sum adscriptus. Ibi maxime anatomiae, beato SEILERO et excell. GUENTHERO ducibus, botanicae, zoologiae et mineralogiae, ill. REICHENBACHIO praeceptore, operam dedi; praeterea autem in arte mathematica et logica excell. LOEWIUM, in physica excell. FICINUM, in pathologia et therapia generali excell. RICHTERUM, in chirurgia excell. PECHIUM, in arte fascias alligandi exper. HERBERGIUM habui praeceptores.

Die XVI. mens. Maii, anni MDCCCXXXI. in album universitatis Lipsiensis ab excell. DROBISCHIO, tunc temporis Rectore Magnifico relatus sum.

Disserentes hic audivi de philosophia excell. HARTENSTEINIUM, de botanica excell. KUNZIUM, de zoologia excell. PÖEPPIGIUM, de mineralogia exp. WEINLI- GIUM, de arte physica b. BRANDES iuniorem, de chemia excell. KUEHNIUM, de anatomia et physiologia excell. WEBEROS fratres, de anatomia comparata exp. ASSMANNUM, de anthropologia et psychologia beat. HEINROTHIUM, de patho- logia generali excell. RADIUM. Deinde ad practicae medicinae studia con- versus, excell. BRAUNIUM et excell. CERUTTIUM, excell. GUENTHERUM et excell. CARUM in illis habui praeceptores; artem obstetriciam ab ill. IOERGIO, morborum muliebrium curam ab excell. GRENSERO, ophthalmiatricam ab excell. RITTERICHIO, medicinam forensem ab excell. WENDLERO, anatomiam patho- logicam et artem auscultatoriam ab excell. HASSIO edoctus sum. Scholas clini- cas et policlinicas, ill. CLARO et excell. WENDLERO, excell. GUENTHERO et excell. RADIO, excell. BRAUNIO et excell. CERUTTIO, nec non ill. IOERGIO et excell. RITTERICHIO ducibus frequentavi. Quibus praeceptoribus omnibus propter insignem erga me benevolentiam et humanitatem gratias ago et in aeter- num persolvam maximas.

Examen pro baccalaureatu die XIII. mens. Augusti, anni huius saeculi XLII, obstetricium die huius anni XI. mens. Aprilis, rigorosum die XXIX. mens. Iunii superavi.

Ornatus in utrisque tentaminibus censura prima, postquam disser- tationem: „*De invaginatione Gerdyana*“ optime defenderat, Medici- nae Doctor dublice pronunciatus est.

V.

FRIDERICUS AUGUSTUS FERDINANDUS HERBERG.

Natus sum Weifae, pago Misnico prope Budissam sito, a. h. sec. VII, d. VII. m. Mai., patre IOANNE GOTTLOB, chirurgo; matre CHRISTIANA, e gente PETZOLD, quos Deus O. M. diu mihi conservet incolumes.

Prima literarum elementa domi accepi, inde ab a. XXII. h. sec., beato SIEBELIS, rectore dilectissimo, mihi maxime favente, gymnasii, quod Budissae floret, civibus adscriptus sum. Annis VI praeterlapsis post, examine, quod examen maturitatis vocatur, superato, gymnasio eiusque praeceptoribus, qui omnes, praecipue b. SIEBELIS et Ill. FRITZSCHE, tunc corrector, de me optime meruerunt et quibus semper animum gratissimum servabo, valedixi, Dresdam abii atque m. Sept. a. XXIII. h. s., direttore b. SEILER, inter cives academiae medi- co-chirurgicae Dresdensis sum receptus. — Ibi praeceptores mihi fuerunt Exp. LOEWE in logice et mathematice, Exc. FICINUS in physice et chemia, Ill. REI-

CHENBACH in mineralogia, botanice et zoologia, b. SEILER in anatomia et physiologia, NOB. DE AMMON in pathologia et therapia generali et materia medica, Ill. CHOULANT in pathologia et therapia speciali, Exc. PECH in chirurgia, Ill. SAHLFELDER in medicina bellica, Exp. HAASE in gynaecologia; — instituta practica adii ducibus CHOULANT, PECH, DE AMMON, HAASE, atque institutum anatomicum duce FRAENZEL, prosectore. — Omnibus his viris, quorum permagnae humanitatis erga me memoriam nunquam abiiciam, gratias ago quam maximas.

Anno I., quem in academia frequentanda peragebam, praeterlapso, examini pro stipendio militari assequendo me subieci; eodem anno examen pro munere chirurgi gradus inferioris militaris feliciter superavi atque a. XXXI. h. s. locus chirurgi eiusdem ordinis mihi traditus est. Tribuno militum b. DE EGIDY, quem morte ereptum lugeo, atque ducibus medicis legionis b. LEHMANN, b. SCHMIDT, Exp. SCHREIBER, qui mihi admodum favebant, Budissae stipendia merui. A. XXXIV. h. s. denuo in academia medico-chirurg. Dresdensi versatus tentamen ad suscipienda munera chirurgi superioris ordinis in academia superavi. Quo facto a. XXXXI. h. s., postquam usque ad hunc annum denuo in I. legione pedestri saxonum stipendia merueram, ad academiam vocatus sum. — Nunc contigit mihi esse tam felici, ut inde a mense Aug. a. XXXIX. usque ad mensem Mai. a. XL. h. s. adiutor Ill. RICHTERI, directoris instituti policlinici; a mense Mai. a. XL. usque ad mens. Februar. a. XLI. adiutor Excell. PECHII, directoris instituti clinici chirurgici academiae medico-chirurg. Dresd. fierem, quorum virorum eximia benevolentia semper ornatus sum. His viris usque ad ultimum diem animum gratissimum servabo.

A mense Febr. autem a. XLI. munus prosectoris eiusdem academiae a. b. SEILERO, qui benevolentiam et humanitatem maximam in me accumulabat, atque me discipulum gratissimum esse reddebat, mihi demandatum est, quo munere ad hoc tempus fungor. Mense Decembre eiusdem a., examine ad gradus et honores medici militaris superioris capessendos superato, rex potentiss. et clementissimus Saxoniae dignitate medici cohortis, rogantibus Exp. SAHLFELDER, direttore rerum medicinalium militarium, et Illustr. nobili DE NOSTITZ-WALLWITZ, amico regis atque direttore collegii a consiliis rerum bellicarum, me ornavit.

A. XLII. h. s. b. SEILER, quum aegrotaret, munus anatomiam et physiologiam docendi mihi delegavit, quod munus, fiducia SEILERI decoratus, lubentissime, quamquam anxio animo, quum ipse tanquam novus homo in rebus anatomicis specialioribus essem, subii.

Examen pro baccalaureatu in nostra alma literarum universitate Lipsiensi, cuius professoribus pro benignitate et humanitate erga me exhibita insigni gratias maximas ago semperque agam, d. X. m. Iulii a. c. atque rigorosum d. XII. mens. Sept. eiusd. a. superavi.

Cum ex tentamine theoretico secundam censuram reportaverat, ex practico autem eandem cum laude, ornavimus eum defensa contra adversarios: „*De erectione penis*“ dissertatione summis in arte nostra honoribus.

VI.

G E O R G H O R S T H E U N .

Natus sum Teuditzii, pago prope ad Lutzenum sito, die XVI. mens. Octobr. a. h. s. XVIII. patre IOANNE GEORGIO et matre CAROLINA AUGUSTA e gente FISCHERIANA, quos parentes carissimos ut Deus sospites diu servet et incolumes pie precor. Primis literis privata institutione partim ludi magistri partim candidati theologiae imbutus ineunte anno MDCCCXXX a. b. WERNSDORFIO, Rectore scholae cathedrali Numburgensi, adscriptus per quinque annos disciplina usus sum FOERTSCHII, WERNSDORFII successoris, MUELLERI utriusque, SCHMIDTII, LIBALDI et BUCHBINDERI aliorumque; tum rebus domesticis commotus scholam Numburgensem cum Martisburgensi mutavi, in quo gymnasio tres annos versatus institutus sum in literis a WIECK rectore, HAUN, HIECK, TENNER, b. LANDVOIGT aliisque. Qui viri omnes, quantum de me meriti sint, in dies magis agnosco. — Examine pro maturitate feliciter superato mens. April. anni h. s. XXXIX. Halae stipendia merui privatim medicinae elementis operam daturus. Anno stipendii militaris absoluto rebus familiaribus consilium medicinae operam dandi relinquere coactus sum. Dubius autem, quibus partibus vitae me darem interdum, occupatus eram per breve tempus in regio iudicio Lutzenensi munusculum quoddam inferius assecuturus. Cum vero patria mea, quae Lipsiae versatur, vidua b. HELFERI, mercatoris huius urbis amplissimi, pollicita esset, se me adiuturam esse, eo commotus sum, ut illud munus, quo in iudicio supra dicto fungebar, relinquerem praefecto meo consentiente, et prius consilium arti medicae incumbendi renovarem. Illius dignissimae foeminae benignitate vehementer adiutus et praecipuo auxilio, quod mihi affinis meus carissimus ROUSSET, mercator h. u. aestumatissimus praebat sublevatus studium meum in Universitate Lipsiensi usque ad hoc tempus tractare potui. Quam ob rem maximas gratias utrique cognato his literis publice ago, et Deum O. M. pie rogo, ut illis de me meritissimis vitam longam et beatam conservet.

Sed reliquum est, ut brevibus disseram de meo studio academico nunc peracto. In Album Universitatis literarum Lipsiensis relatus sum Rectore Magnifico DROBISCHIO mens. Novembr. anni h. s. XL. Praeceptores habui in philosophia Exc. DROBISCHIUM, in mineralogia, zoologia et botanice Exc. SCHWAEGRICHENIUM, in physice Exp. MARBACHIUM, in chemia Exc. KUEHNIUM, ERDMANNUM et LEHMANNUM, in anthropologia et psychologia b. HEINROTHUM. In anatomia, tam

generali, quam speciali, in physiologia, embryologia et in arte cadavera secandi secutus sum *Exc. WEBERUM* seniore et iuniorem, nec non *Excell. BOCKIUM*. Pathologiam generalem *Exc. RADIUS* et *NEUBERT*, therapiam generalem et materiam medicam *Exc. BRAUNE*, artem formulas medicas recte praescribendi *Exc. KNESCHKE*, pathologiam et therapiam specialem *Exc. CERUTTI*, chirurgiam *Exc. GUENTHER* et artem fascias alligandi *Exc. CARUS* mihi tradiderunt. Praeterea audivi de ophthalmiatria *Exc. RITTERICHUM*, de medicina forensi *Exc. WENDLERUM*, de arte obstetricia *Ill. IOERGIUM*, et *Exp. CLARUM* iun. de morbis pulmonum et cordis eundemque de arte morbos per acusticem cognoscendi.

Ita ad studia practica praeparatus institutum clinicum regium ducibus *Ill. CLARO*, *Exc. WENDLERO* et *GUENTHERO*, instituta policlinica: medicum *Excc. CERUTTIO* et *BRAUNIO*, chirurgicum *Expp. CARO* et *WALTHERO* moderatoribus frequentavi; scholae obstetriciae clinicae *Ill. IOERGII* et demonstrationibus in nosodochio d. Georgii ab *Exc. RADIO* habitis interfui, nec minus defui in schola ophthalmiatrica duce *Exc. RITTERICHIO*.

Quibus praeceptoribus omnibus ob eximiam erga me benevolentiam et humanitatem, qua omni tempore me exceperunt, quomodo dignas persolvam gratias re vera nescio.

Examen pro Baccalaureatu dictum die XXX. mens. Aug. a. h. s. XLIII. subii, examen obstetricium die XXI. Iun. a. c. et rigorosum d. XVI. mens. Octbr. h. a. feliciter superavi.

In his examinibus censura secunda dignus iudicatus defendit die supra dicto Dissertationem sub titulo: „*De casu aliquo cordis dilatata*“ contra dissentientes; posteaque *Medicinae et Chirurgiae Doctor* publice creatus est.

VII.

ADOLPHUS THEODORUS WENDLER.

Natus sum Lipsiae d. X. m. Octobris a. h. s. XVII. patre CHRISTIANO ADOLPHO WENDLERO, medicinae doctore, medico huius urbis practico, medicinae pol. forensis in universitate literarum professore ord. et matre IULIA HENRIETTA e gente ERNESTINA. Primis literis privatim imbutus, a. h. s. XXX. ab exc. NOBBIO, rectore scholae Nicolaitanae, discipulis adscriptus, per sex fere annos disciplina usus sum NOBBII, FROTSCHERI, FORBIGERI, HEMPELII, KUECHLERI, FUNKHAENELII, KLEEI, b. DIETRICHII, MARTINI, MICHAELIS. Examine pro maturitate superato d. XXIX. m. Aprilis a. h. s. XXXVII., medicinae operam daturus in civium universitatis literarum Lipsiensis numerum, rectore SCHILLINGIO, receptus sum. Hic DROBISCHII scholis philosophicis, KNESCHKII encyclopaedicis,

b. HEINROTHII anthropologicis et psychologicis, SCHWAEGRICHENI botanicis, zoologicis, et mineralogicis, KUEHNII, ERDMANNI et LEHMANNI chemicis, FECHNERI physicis, WEBERI anatomicis et physiologicis interfui. De eadem anatomia audiui etiam BOCKIUM. In arte cadavera secandi WEBEROS fratres magistros habui; de anatomia comparata ASSMANNUM audiui. Postea in pathologia ac therapia generali secutus sum LOTZIUM, in speciali CERUTTIUM, in materia medica BRAUNNIUM, in chirurgia GUENTHERUM, in arte obstetricia IOERGIUM, in ophthalmiatria RITTERICHIIUM, in anatomia pathologica HASSIUM, in medicina forensi WENDLERUM patrem. Praeterea etiam in universitate literarum Berolinensi de materia medica audiui MITSCHERLICHIIUM, de pathologia et therapia speciali SCHOENLEINIUM, de chirurgia IUENCKENIUM, de auscultatione et percussione ROMBERGIUM, de arte medicamentorum praescribendorum CASPERUM. Ita praeparatus, quae Lipsiae florent, instituta clinica frequentavi, medicum internum sub CLARI et WENDLERI patris, chirurgicum sub GUENTHERI auspiciis, policlinicum, tam internum quam externum, CERUTTIO, BRAUNIO, WALTHERO et CARO moderatoribus, obstetricium duce IOERGIO. Ad finem vitae academicae patri adiutorem me praebui in curandis aegrotis.

Examen theoreticum superavi die XXIII. m. Mai. a. h. s. XL., practicum vero die XXVI. m. Iun. a. h. s. XLIV.

Satisfecit Ordini nostro ita, ut in tentamine theoretico tertia, in altero vero, quod dicunt rigorosum, secunda censura ornatus, summisque Medicinae honoribus dignus iudicatus esset. Ad quos obtinendos a. d. XI. Mart. h. a. propugnabit dissertationem inauguralem: „Nonnulla de mortuorum inspectione,“ moderatore excellentissimo SCHWAEGRICHENIO, Seniore Gravissimo. Quo certamine feliciter finito ego Cancellarii vicarii munere functurus in candidatum, filium dilectissimum, medicinae ac chirurgiae Doctoris iura et ornamenta solemni ritu conferam.

Vos itaque, **RECTOR ACADEMIAE MAGNIFICE, UTRIUSQUE REIPUBLICAE PROCERES ET FAUTORES GRAVISSIMI, COMMILITONES** denique **ORNATISSIMI**, ut hunc actum Vestra praesentia condecorare velitis omni qua par est observantia rogatos esse cupio.

P. P. Dom. Iudica MDCCCXLV.